

浙江文叢

輿地紀勝

〔第八冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第八冊〕

卷第一百七至一百二十八

〔宋〕王象之 編著 趙一生 點校

輿地紀勝卷第一百七

廣南西路

昭州 平樂 龍平 昭潭 蒙山 荔浦 開江

州沿革

昭州，下。平樂郡，軍事。《九域志》。《禹貢》：荊州之域。《元和郡縣志》云：富州所載。富州今屬昭州。古百越之地。《昭潭志》云。又韓文「公」云：『踰閩越而南，皆百越之地。』牽牛、婺女之分野。《漢書·地理志》謂：『牽牛、婺女之分野。今之蒼梧、鬱林皆粵地也。』秦平百越，爲桂林郡地。《寰宇記》。二漢並屬蒼梧郡地。《寰宇記》及《圖經》以爲本荔浦縣地，而《元和郡縣志》以爲本蒼梧郡之富川縣地，不同。象之考之：《晉志》：平樂、荔浦皆屬始安郡，乃今之桂州，而富川乃屬賀州臨賀郡，割隸之際，各從近地，則或者其荔浦之地歟？當考。吳置始安郡，仍置平樂縣以隸焉。《圖經》云：『吳黃武五年，割零陵之始安爲始安郡，分蒼梧之荔浦屬焉，始創平樂等七縣。是《圖經》以平樂之爲縣，乃析荔浦之地而爲之也。又

《元和郡縣志》云：『吳甘露元年，分富川縣置平樂縣，屬始安郡。是《元和志》以爲平樂之爲縣，乃析富川而爲之也。』《舊唐志》又以爲晉置平樂縣。三者俱不同，當考。晉、宋、齊因之。《晉志》、《南齊志》始安郡下並有平樂縣。至隋不改。此據《元和郡縣志》。而《隋志》始安郡下有平樂縣。唐平蕭銑，以始安郡之平樂縣置樂州。《唐志》云：『武德四年，以始安郡之平樂縣置樂州。』《圖經》以爲隋置平樂郡。與《唐志》不同。

象之謹按：《隋志》：桂州下有平樂縣。而別無平樂郡，則隋初未嘗置平樂郡也。《舊唐志》云：『唐平蕭銑，置樂州。』然《通典》云：『大唐置樂州，則蕭銑亦未嘗置樂州也。』當從《隋志》及《通典》。析置沙亭縣，《廣西郡邑圖》。又以蕭銑所置恭城縣來屬，同上。與永平縣而四。《昭潭志》。尋省沙亭縣，《廣西郡邑圖》：在貞觀七年。更名昭州，《舊唐志》：在貞觀八年。取昭潭以爲名。《輿地廣記》。改平樂郡，天寶元年。復爲昭州。乾元元年。唐末爲馬氏所有。《通鑑》：唐昭宗光化（元）〔二〕年，馬殷平嶺北。又《五代史·馬殷傳》：『楊行密袁州刺史呂師周奔楚，馬殷使牽兵攻嶺南，取昭、賀、梧、蒙、龔、富等州，殷表師周昭州刺史。』五代後周時，陷于南漢。《通鑑》：後漢高祖乾祐元年，南漢將吳懷恩擊楚，拔賀州，又陷昭州。又後周太祖廣順元年，南漢主遣將吳懷恩進取，因以兵略定宜、連、梧、嚴、富、昭、柳、象、龔等州。皇朝平嶺南，地歸版圖。《五代史·劉鋹傳》：『開寶三年，潘美平賀州，十月平昭州。』廢富州，以龍平縣來隸，省思勤、馬江二縣入焉。《國朝會要》：在開寶五年。廢永平縣，入平樂。《國朝會要》：在開寶五年。又廢蒙州，以立山縣來隸，省東區、蒙山二縣入焉。《國朝會要》：在熙寧五年。今領縣四，治平樂。

縣沿革

平樂縣，中。

倚郭。《舊唐志》云：『州所治也。晉置平樂縣。』《元和郡縣志》云：『本漢富川縣地。吳甘露元年，分富川縣於此置平樂縣，取平「樂」^{〔三〕}溪以爲名。』而《寰宇記》諸書皆以爲本荔浦縣，吳分荔浦縣置平樂縣。不同，當考。自吳至隋皆爲平樂縣，無所更改。《元和郡縣志》云：『武德四年，於縣置樂州。貞觀八年，改樂州爲昭州。』《國朝會要》云：『開寶五年，廢永平縣，隸平樂縣。祥符元年，移治州城東。』

恭城縣，下。

在州北八十里。《唐志》云：『蕭銑置。』《元和郡縣志》云：『武德四年，析平樂縣置。』有小不同，當考。《通典》：恭城縣下亦不載蕭銑建置一節，姑兩存之。

龍平縣，〔中〕^{〔三〕}。

在州東南一百六十二里。《元和郡縣志》云：『富州龍平縣，本漢蒼梧郡臨賀縣地。梁武帝分臨賀郡於龍平縣置南靜州。開皇十一年，州廢，以龍平縣屬桂州。貞觀八年，於此置富州，縣亦屬焉。』《國朝會要》云：『開

寶五年，廢富州，以思勤、馬江二縣（以）入龍平，以龍平隸昭州。《九域志》云：『熙寧八年，以龍平縣隸梧州。元豐三年，復來隸。』《國朝會要》又云：『宣和六年，改龍平縣爲昭平縣。』

立山縣，中。

在州南二百一十二里。《元和志》云：『蒙州立山縣，即漢蒼梧郡荔浦縣。武德五年，置立山縣，屬（隸）[荔]^{〔四〕}州，又於此置南恭州。貞觀八年，改爲蒙州。』《國朝會要》云：『熙寧五年，廢蒙州，以立山縣屬昭州，省東區、蒙山二縣入焉。』

風俗形勝

取昭潭爲名。《寰宇記》云：『貞觀[八年]^{〔五〕}，改樂州爲昭州，取昭潭爲名。』《湖南記》云：『潭州亦取昭潭爲名。』則彼此皆有昭潭郡，北有昭潭、岡潭，只在江中，潭蓋因岡以爲名。謹按《元和郡縣志》云：『平樂（郡）[溪]^{〔六〕}在縣南三里。水（約）[之]^{〔七〕}西岸有昭潭，周回一里，其深不測。』如此則方應昭潭之號，不應便指昭崗以爲昭潭也。當從《元和志》。居蒼梧、始安之間，與全道地犬牙相入。風聲氣習，布衣韋帶之士，肩摩袂屬，視沅、湘以南猶伯仲。已上並《昭潭志序》。與九疑、清湘接境，其風俗大率相似。《昭潭志·風俗門》。灘瀧三百六十所，至昭而中分。俗謂自靜江沿瀧川，合樂川，以至梧云云。自昭而上至靜江，不甚險惡；自昭而下至昭平及梧，名銳石，灘高而水湍激，兩岸皆懸崖峭壁。決科入仕，每每不

乏，朝廷興崇學校，而中上舍者三人，貢辟雍者二人。鄒道鄉先生《得志軒記》。

景物上

西山 在平樂縣西二百步。有巨石徑百尺，屹立水中，如神龍戲珠狀。

南亭 在州市。

井泉 《舊圖經》云：『古無井，人飲澗水多惡毒，飲者生疾。咸平開井六年，在立山縣。』

昭潭 《昭潭志》云：『在今光孝寺考槃澗之口。』

漓川 自州西合流，東南過梧州，會于邕容江，至廣州入于海。漓川，即漢戈船將軍下漓水即此水，而

樂川出道州九嶷山。

樂川 見上。

蒙江 《晏公類要》：『在平樂縣。』

桃嶺 在昭平縣南二十里，上有仙桃數本。

粉巖 在郡東徐村。

巾山 在郡東五里。兩穴相並，明潔可遊觀。

帽山 在昭平縣北六十里。山頂常有雲如帽，因名。

頓山 在立山縣南四十里。《舊經》云：『其山當龔州陸路，山下有泉，過者必投泉爲食，因名頓山。』

誕生

在平樂縣東南一百里。山峭峻不可登，山前有廟，即二仙廟也。

縈山

《元和郡縣志》云：『在平樂縣東三十里^(八)，有木客。』郭仲產《湘中記》曰：『平樂縣縈山，中多

曲竹，有木客，形似小兒，歌哭、行坐、衣服不異於人而能隱形。山居，時出市易作器，人亦無別。』

雲嶺

在昭平縣東南四十里。

曲竹

《湘中記》曰：『平樂縣縈山多曲竹。』

壽竹

《類要》云：土產有壽竹。

齧鼠

山多簾竹、箴竹，池澤中多鼠，齧食之。

燒春

鄉俗多酒，皆謂之燒。詳見梅公詩注。

景物下

獨也亭

在郡左東山之上，前有四松。

雙榕閣

在州治東二里江邊，居兩榕之間。

三瑞樓

在州治城上西隅。

七松樓

三瑞樓也。

十愛亭

在城「內」^(九)，光孝寺門之側。景祐中，刺史梅摯作亭，有石刻，載公《十愛詩》。

天繪亭

《夷堅志》云：『廣西昭州，最爲瘴毒之地，而山水頗清婉。郡圃有亭名「天繪」。建炎中，郡

守李丕以與金國年號同，欲更之。乞名於寓公，徐師川久而未得，有范某者爲易曰『清輝』。已揭榜，徐謁李同坐亭上，少焉策杖於四隅，視積壤中有片石班班如文字然，命取而滌之，乃邱潛所作《記》，其略云：「予擇勝得此亭，名曰『天繪』，取其景物自然也。後某年月日，當有俗子易名『清輝』者，可爲一笑。」考命名之日不差。今亭在西山福聖寺。」

天繪閣

昭州山寺中有天繪閣，故老相傳云：鄒中丞居此三年不一下。見《浯溪集》。

捲雨樓

在子城西，澄清樓之右。

書雲樓

在州治南。

澄清樓

在子城西。

靈秀亭

在恭城護國寺之山麓。《舊經》載：『山有古松一株，上喬下樛，中貫連理，晦榛莽中。熙寧

間，寺僧夜夢神人自稱大夫，遲明焚山，松屹然獨見，鄉人神之，因作亭其上。』

梅公亭

在州衙之東。梅摯作亭，以昭州所爲詩、《五瘴說》刻石（嵌〔一〇〕于壁）。

目巖山

盛洪之《荊州記》云：『其岩間有兩目，如人眼極大，瞳子黑白分明，因爲目巖山。』《元和

志》：在平樂縣北三十里。

甘巖山

《九域志》云：有泉甘美。《圖經》云：在恭城縣。

古迷山

在立山縣南三十五里。相傳云：山深遠，入者多迷。而廖秀穎又曰：山之頂如眉彎，俗號

曰『古眉』。

陶李峒

在樂平縣。有二仙廟，又有陶、李二人〔大〕〔二〕姓世爲婚姻。唐陶英太尉謫居，與李氏聯

姻，此洞千數百家，二姓獨存。

松柏廟 在平樂縣西一里。漓川之北，樂川之西。

木良塘 在城北。道鄉先生鄒公（記）《得志軒〔記〕》^{〔一〕}曰：『仙宮嶺下有塘數十畝，曰木良塘。』即

此也。鄒道鄉僑寓于此。

蓮花寺 在勞津之上，一里許。

茶山洞 在立山縣境。與修仁聯，故所作茶片莫辨其爲修仁也。

荔浦水 《九域志》：源出桂州荔浦縣。

沙亭水 在舊沙亭縣西北，出海陽山。

慶林寺 治平中，開壕得石佛五尊，即其地爲慶林寺。

平旦驛 在昭平縣西南五十里。《舊經》：有都管木柱八條。《咸平圖經》注云：『雷州出，能辟惡

蛇，或有所傷，〔括〕〔刮〕^{〔二〕}爲末貼傷，去其痛立止。其都管八條，置於館驛八處。』

平樂溪 《九域志》云：『在縣南三里，水西岸有昭潭。』

平樂水 《元和志》云：西去恭城縣一百步。

崇元觀 在恭城東五里。觀有古木腔，太平興國九年，殿中侍御史周渭《序》云：『故〔若〕〔老〕相傳，

觀有〔齊〕〔齋〕^{〔三〕}醮，常有鬼運水滿腔，應用不匱。後觀徒泄之，鬼乃罷運。』

開元觀 《九域志》云：有唐明皇御容。

光孝寺

殿貯銅佛一軀，五代僞劉時所鑄，云（天）〔大〕〔二五〕寶四年。

羅浮山

在立山縣。舊注引《郡志》云：『博山浮海而來，博着羅山，遂以名之。』然彼乃惠州故事，姑

兩存之。

銀殿山

《元和志》云：『恭城縣東二十八里，有銀殿山，其下有鍾乳穴十二所，山際明白，有銀。』

玉虛觀

在州北一里半。

金堆橋

在恭城縣。

玉白泉

在昭平縣龍門峽，左去縣西北十里。治平間刻石，上有『龍門峽玉白泉』六字。

石佛池

在今慶林佛堂之前。治平〔間〕〔二六〕，疏鑿得石佛，因以爲池。

寶山寺

在昭平縣。

銅鼓山

州城望之，隱然在西〔高〕〔南〕〔二七〕隅，有拱揖之狀，係在荔浦界中。

金線陂

銀線陂 並在立山縣。

彈圓溪

《晏公類要》云：『溪中石如彈圓，有蝦魚四足，含水仰天不動，小鳥就飲，因而吞之，故名。』

印崗山

在昭平縣東五里。山勢似印，故名。

考槃澗

在州東二里。泮水橋跨之。

鷓鴣渡

在平樂縣之北三十五里。

鐵馬廟

在平樂縣。

黃牛崗 在平樂縣西。崗頂有石，狀如黃牛，故名。

白羊橋 在恭城縣。

白鶴觀 在恭城縣東口里。有石聖母像與侍童三軀，像本出南蕃，唐開元中，蕃舶歸番禺，卜留不吉，

以舟載像，至漓口舟挽不動，遂歸是觀。

白土坑 在龍平縣。《嶺表錄》云：『在富州城北隅，其土白膩，郡人取以爲貨，終古不竭。今五嶺婦女率皆用之，又名鉛粉。』

龍嶽峰 在平樂縣東北五里。有峰十數，排立如筆架。道卿《得志軒記》云：『有峰數十仞，曰龍嶽。』即此峰也。

駱雍水 在立山縣南二十里。《舊經》云：『其泉有靈，若相爭是非不決，酌而飲之，非者必致疾。』

三石山 在立山縣南十里。父老相傳，僞漢時有兵入靜江，道過此，黎明遇獵師（倚）「縱」^{（一八）}黃犬逐一鹿過，前兵以槍刺鹿，徐視之，一巨石也。己而人犬皆化爲石，鼎峙道三方。今石有刺痕不沒云。

大法場 《嶺外代答》云：『嶺外毒瘴，不必深廣之地，如海南之瓊管、海北之廉、雷、化，雖曰深廣，而瘴乃輕。昭州與湖南靜江接壤，士大夫指爲大法場，言瘴毒之多也。若深廣之地，如橫、邕、欽、貴，其瘴殆與昭等，不知小法場之名在何州？又廣東以新州爲大法場，英州爲小法場。』

陽里穴 邠溪穴 《元和志》云：『平樂縣東三十里，有陽里穴、邠溪穴、新穴，皆出鍾乳。』

和風山 在立山縣西南五十里。

冷泉山 在立山縣西北七十里。

清涼寺 在平樂縣北五十里。

感應泉 《夷堅己志》云：『鄒忠公再謫昭州，江水不可飲，汲於數里外山中，暑月殊以爲苦。所居仙宮嶺下，忽有泉涌，清冷瑩潔，因疏爲小池，日得四五斛，遂給用，名曰感應泉。將有北歸之命，數日前泉乃涸。旋有人大醉至門，厲聲呼曰：「侍郎歸矣。」尋求不可見。明日拜命，故龜山楊中立爲公挽詞，有「泉甘不出戶，客至豈無神」之句，蓋指二事也。』

富豪山 《輿地廣記》：在龍平縣。《舊經》云：『此山產金，因名富豪。』

仙女巖 在立山縣蒙山。

古跡

昭州角 《蒼梧志》載《廣西遊語》云：『梧州樂，昭州角。』

故樂州城 《九域志》、《圖經》：『在舊平樂縣西南三里。』

故孤州城 在平樂縣東南四十里。《舊經》云：『唐天冊「萬歲」^{〔一九〕}元年置，光大元年廢。』

廢富州城 《寰宇記》云：『本開江郡理龍平縣。秦桂林郡地，漢屬蒼梧郡之臨賀縣。吳大帝權置臨

賀郡。梁武分置南靜郡。陳爲靜尉郡。隋始安郡之龍平縣。唐平蕭銑，置靜州，尋又分置富州。天寶元年，改爲開江郡。乾元元年，復爲富州。』《國朝會要》云：『開寶五年，廢州，入龍平縣，隸昭州。』

故蒙州 《國朝會要》云：『蒙山郡領三縣，熙寧六年，廢蒙州，以立山縣隸昭州。』

故立山縣 《國朝會要》云：『熙寧「間」^{〔二〇〕}，廢蒙州，以縣隸昭州。』

廢安樂縣

《寰宇記》云：『在龍平縣東北五里。』

廢歸化縣

《寰宇記》云：『在龍平縣北三十里。』

廢博勞縣

《寰宇記》云：『在龍平縣北三十二里。』

廢馬江縣

《寰宇記》云：『在龍平縣南一百里。隋開江縣。唐長慶三年，桂管觀察使奏其江是馬援

所開，請改爲馬江縣。從之。』

廢思勤縣

《寰宇記》云：『在龍平縣北一百四十里。〔漢〕^{〔三〕}臨賀縣也。』

故沙亭縣

在平樂縣東^{〔三〕}三十五里。《唐志》云：武德四年置，貞觀七年，併入平樂縣。

故永平縣

在平樂縣東北。《元和志》云：『（澄）〔證〕聖元年，割平樂縣〔永平鄉〕^{〔三〕}置。』《國朝會

要》云：『開寶五年，併入平樂縣。』

崑崙城

在平樂縣東南四十里。

靖尉山

在昭平縣南二里。《舊經》云：『耆舊相傳，開元中月夕，唐明皇從葉靖雲駕，下幸是山，山

有御座基尚存。又幸前進士陳滿堂家，滿堂初未之識，已而見所服御器皆黃金，始悟，未幾，其家生金筍滿堂，尋亦不知其所往。』

鄒侍郎祠堂

在城〔北〕^{〔三四〕}木良塘之西得志軒。左司張栻爲《記》。

御史堂

在恭城縣東五里興國寺之西。皇朝御史周渭爲殿中侍御史，持節本路，寺乃御史讀書之室，

故名。

侍郎井

在木良塘之西、仙宮嶺之半。鄒公在昭州之日所開。

魯般井 在光孝寺東。周匝甃砌，每級有磚佛一層，郡人呼爲魯般井。

舜祠 去平樂縣三十五里。

昭靈廟 在昭平縣，漢伏波將軍廟。

御史廟 在城北木良塘，御史呂渭廟。

葉靖尊師祖墓 在恭城縣西水島之平山。古傳尊師祖葬于此，每歲上元必來省墓。去墓十里有大

悲寺，元豐初有客姓葉宿于寺，因口占詩八句。僧但記其斷章云：『明朝蓬島去，白雪滿頭飛。』翌旦未啓扇，而人馬遽失。

官吏遷客避地附

唐·敬超先，唐·杜子美《人日寄高蜀州詩序》云：『今海內忘形故人中，獨漢中王瑀與昭州敬使君超先在。』韋陟，天寶十二載，貶平樂尉，楊國忠忌其才，諭守吏令脅陟使憂死。土豪勸以輕舟泛溪峒，陟

曰：『我積信國朝，無負神理，命之合』〔當〕〔二五〕爾，其敢逃刑？』歲餘，起爲吳郡守。

李珣，會昌元年，

再貶爲昭州刺史。

呂師周，《五代史·馬殷傳》：『殷以師周爲馬步都指揮使，率兵攻嶺南，取昭、賀、梧、蒙、龔、富等州，殷表師周昭州刺史。』〔國朝〕·梅摯，以殿中丞出守昭州，作《五瘴說》，又作《我愛昭州

好》十詩，刻之郡〔國〕〔圃〕〔二六〕。

汪齊，治平中出守，移州治于今所，築子城。《石佛堂記》云：『武德中，遷州治于昭潭之北，有江水之患，乃易地〔于〕〔子〕〔二七〕城清化營。』嚴諷，宣和中爲守，徙夫子廟于城北，

買田入學以養(仕)「士」^{〔二六〕}。

王正倫，皇祐中，儂賊寇二廣歸，由館門太尉王正倫以兵邀戰，不尅被害。

其子景仁即其地結草堂祠之，朝廷贈節度使，紹聖元年贈忠顯。

鄒浩，《東都事略·鄒浩傳》云：『有田

畫者，志義之士也，與浩善。浩除言官，畫見浩問曰：「平生與君相許者何如，今君爲何官？」浩愧謝。畫歸陽翟，一日報立皇后劉氏，畫曰：「鄒君不言，可以絕「交」^{〔二九〕}矣。」又一日，浩以書約畫會(穎)「穎」昌，中塗自云：「得罪。」畫亟往，浩具言諫立皇后時，「我之言慙矣」，上于時凝然若有所思也。明日遂得罪。二人留連三日，臨別浩出涕，畫正色責之曰：「使君隱默官京都，遇寒疾不汗，五日死矣。豈獨嶺海之外能死人哉？願君無以此舉自滿，士所當爲者，未止此也。」浩茫然自失。」

胡銓，紹興八年，爲密院編修，上疏乞斬王倫并秦

檜、孫近，乃以銓監昭州鹽倉。銓之行也，鼓院陳剛中以《啓》送之，云：『屈膝請和，知廊廟禦侮之無策；張膽論事，喜樞庭經遠之有人。身爲南海之行，名若泰山之重。』又云：『知無不言，願請上方之劍；不遇故去，聊乘下澤之車。』坐謫知贛州安遠縣。

徐俯，《繫年錄》：『俯之母，黃庭堅從妹也，避亂抵昭州。紹興二年，上賜呂頤浩手詔曰：比觀《黃庭堅集》，稱其甥徐俯師川者，聞其人在靖康中立節可嘉。頤浩奏俯避地廣中，乃除諫議大夫，遂執政。』

路彬，紹興二十年，廣西提刑路彬代還，言昭州夏稅折布錢最重，乞蠲減。戶部看詳，欲於見納價上(三)〔一〕分減一，每匹折細錢一千。從之。《繫年錄》。

人物

「國朝」·周渭，字得臣，恭城人。慷慨有大志，五季之亂，僞劉竊據嶺表，乃客游湖湘。建隆初，由桃源舉進士走京師，以書干藝祖皇帝，畫下嶺表之策，召對稱旨，賜進士出身，調滑州白馬「主」^{〔三〇〕}簿，遷贊善大夫。

符彥卿暴恣不法，除渭爲屬邑永濟縣令俾繩之。彥卿聞其來，魂膽俱喪，韃囊郊迓，渭但揖於馬上。境上數強盜劫財傷人，彥卿受賂，縱之使逸。渭出令，敢有藏盜者斬。不數日獲之，不解府，即時斬決。以按具奏，太祖大壯之，太宗時爲御史，乞不受錫賜，願免昭州所收百姓秋苗耗米。鄉人德公，即其堂而祠焉，徐俯爲《廟記》。

莫節婦，《長編》云：『南漢人，居昭州。僞政酷暴，周渭避地道州，蒼惶北走，不暇與妻莫氏（談）「荃訣」，二子留莫所。莫少，父母欲嫁之，莫涕泣誓志，乃親績確舂，以給朝夕，二子皆畢婚嫁，凡二十六年。太平興國初，渭爲廣南運副，訪求得之，渭時已改娶，欲復迎荃，荃曰：「君既有室，我不可復往。」時人嘉嘆，爲著《莫節婦傳》。渭亦具奏，詔贈爵命之，并其二子皆賜以官。』又《皇朝類苑》載：朱昂撰《莫節婦傳》所載略同，但昂謂渭還時，夫婦俱已皓首，遂偕老如初，與此小異耳。

韓迴，郡人。知安樂縣，以太子中舍致仕，於東莊作東山書院，號東山野叟，年八十有三。運使李師中以詩贈之曰：『未衰前已得懸車，骨立清風八十餘。松竹最宜貧宅舍，江山偏照白髭鬚。』

張雲卿，字夢立。居州城北，木良塘在其南，龍岳峰在其東。崇寧中，鄒浩（至）「志」完謫居郡，雲卿延之於家，首尾四年。鄒爲名其所居之軒曰『得志』，爲作《記》。

覃冲，字子虛，居鄉里，稱善人。紹興辛亥，樞密徐俯師川避地于昭，所居有茂林脩竹，名『自強齋』，師川來居凡三年，賦《自強齋詩》三絕，曰：『青蕪且作弦歌地，白屋曾爲將相家。莫倚田疇日富足，門標六戟自光華。』黃葆光，徽宗朝，蔡京總治三省，侍御史黃葆光疏論之，罷知立山縣，貶昭州。《事略》云。

仙釋

二仙，有二仙廟，在平樂縣。宣和中，李宗誼狀稱陶李洞有名山，父老相傳，先是有二女遊此山，修黃帝、